


## FASNACHTSGESELLSCHAFT



BASEL

STAMM

GEGR. 1955

### Fasnacht 2007

#### nit scheniere – operiere – ummepfusche - ykassiere

Und luegsch Dy emool gnau aa am Morge  
Bestuunsch im Spiegel s Konterfey  
Denn drugge Dy uf aimool d Sorge  
Dr Schogg sitzt dief - do losch e Schrey  
Was dir so druurig duet entgeege gnaisse  
Isch die brutaali Wirggligkait  
Das kaa kai gueti Zyt verhaissie  
Denn leider bisch vvyll z schwäär und z brait  
Me gseet s dr aa as gärn duesch ässe  
Und as de schlemmsch und dringgsch mit Gnuss  
Und s Wort Beweegig hesch scho lengscht vergässe  
Denn Fytness bringt dir nur Verdruss  
De glaubsch es kuum as d Lääbesjoor  
Sich so dief in d Huut dien ynebrääge  
Und zwische Falte und de graue Hoor  
E Fratze blitzt wie drey Daag Rääge  
Au d Augeliider hänggen aabe  
Und liige fascht scho uf de Dräänesegg  
D Oore schimmere wie Hoonigwaabe  
Und erinnere an Daig vom Pfluutebegg  
Au d Bagge hänn sich vo dr Schwärgraft lo besiige  
Und maane an e Bärner Sennehund  
S Dreyfach-Kiini kunnt uf d Halswilscht z liige  
Au die wiige guet und gärn zwai Pfund.  
Und schwaift dy Bligg denn wyter aabe  
So wird s dr erscht rächt Angscht und bang  
An dääre Hienerbruscht kaa sich kaine laabe  
Derfiir wölbt sich e Wanscht mit groossem Drang  
Dr faissy Ranze verweert zum Gligg  
Dr Bligg uf das wo diefer unde sich bewegt  
De kaasch nummen aane as do s beschti Stigg  
Naime zwische Schwabbelfalte sich verschtegg  
Au d Waade glyyche Segg voll Maade  
Und bambele am Gnochegstell  
Bref d Gsundhait hängt no am e Faade  
De glyyysch als wie mee ere Wurscht vom Bell  
Und dyny Fiess, sofärn no kaasch druff aabeluege  
Sin fascht so flach wie Wajeblääch  
Das bringt dy Gwisse uus de Fuege  
Und d Zuekunft schynt ganz schwarz und zääch  
Mit sooneme Boddy gits kai Bryys me z gwinne  
Vomen e Adonis bisch meilewyt ewägg  
Jetz gits nur ains, de muesch dy bsinne  
Wie bringsch ganz schnäll ewägg dä Spägg.  
Zum Gligg gits do so Scheenheitsspittel  
Wo geege moderats Entgält  
Vo Moode-Ärzt im wysse Kittel  
Versproche wird e haili Wält  
Fir e baar zäädausig Frangge  
Bikunsch dert im Nuu dy Juuged zrugge

Fir e baar Labbe kaasch dert Scheenhait tangge  
Me baut zem Bodymaass die goldig Brugg  
So ligsch denn aane uff dä Schraage  
Losch gottergäabe s Schiggsaal walte  
Und hoffsch as trotz em Schnyyde, Schaabe  
E Dail vo dym Kerber blybbt erhalte  
Du gseesch dy scho im scheenschte Model glyche  
Mit blonde Hoor und schlangge Bai  
Goots lätz, so wirsch zur Wasserlyyche  
Und schlychsch verstimmlet wiider hai  
Fir drey-vier Dausig losch dr d Falte glette  
Fir fünf Riise au no s Fätt abschaabe  
Zwaidausig koschtet s d Wäädli z rette  
Dito d Blattfies, as de frisch kasch draabe  
Au d Libbe losch dr sexy schyyme  
Und d Oore satt an d Kopfhut binde  
S Dobbelkiiny frisch verlyyme  
Und dr Ranze zieht me satt no hinde  
D Fuudi Falte wärde gspachtlet  
D Ooreläbbli ummeglitz  
D Dräanesegg wärde verschachtlet  
Und neyi Hoor in d Kopfhuut gritzt  
D Zeen duet me nadyrlyg au ersetze  
D Bruscht wird gliftet und modeliert  
Dr Kiruurg duet nomool s Mässer wetze  
Bevoor äär dy wyter masagiert  
Will de z glai bisch duet me dy no stregge  
S wird d Gnochelengi korrigiert  
Und duesch derby au fascht veregge  
Grad non e Niere implantiert  
Denn ligsch no dääre Gwaltstortuur  
Säx Wuche flach und duesch s erdulde  
Dä Scheenhaitkampf hinterlosst sy Spuur  
Statt eme Vermeege hesch jetz Schulde  
Und kunnt ändlig denn dä Augeblig  
Wo gedrausch in Spiegel z luege  
Denn mainsch es syg en iible Drigg  
Und keysch fascht uus de Fuege  
Statt s gwoonti Bild vor Auge z haa  
Gnaist do e ganz fremd Wääse  
E Frazegschalt luegt dy grooss aa  
Mit em Scharm vo alte Bääse  
Nyt isch gsi mit Ruggverwandlig  
Kai holdi Jugend luegt dy aa  
Was dy do aastart isch Verschandlig  
Das zwaiti Gsicht wotsch gar nid ha  
Jetz hesch das Gsicht und wotsch es nid  
Und doch muesch s hald jetz bhalte  
Hättsch vorhär iberleggt dä Schritt  
Denn hättsch no s Gäld und d Falte!

D Scheenhaitskonkuränz vo de Ladärne isch wie  
allewyl uff em Minschterblatz und d Waage- und  
Reggwisyte-Uusstellig bi dr Kasäärne vom Mäntig  
Zoobe bis am Mittwuch demorge.

[www.muggedaetscher.ch](http://www.muggedaetscher.ch)